





白氏長慶集卷第七

唐太子少傅刑部尚書致仕贈尚書右僕射太原

白居易樂天著

明後學松江馬元調異甫校

閒適三

古調詩五言凡五十八首

題潯陽樓

自此後詩江州司馬時作

常愛陶彭澤文思何高玄又怪韋江州詩情亦清閒
今朝登此樓有以知其然大江寒見底匡山青倚天深夜
湓浦月平旦鑪峯煙清輝與靈氣日夕供文篇我無二
人才孰爲來其閒因高偶成句俯仰愧江山



訪陶公舊宅 并序

予夙慕陶淵明爲人往歲渭川閒居常有劬陶體詩十六首今遊廬山經柴桑過栗里思其人訪其宅不能默默又題此詩云

垢塵不污玉靈鳳不啄羶嗚呼陶靖節生彼晉宋閒心實有所守口終不能言永惟孤竹子拂衣首陽山夷齊各一身窮餓未爲難先生有五男與之同飢寒腸中食不充身上衣不完連徵竟不起斯可謂真賢我生君之後相去五百年每讀五柳傳目想心拳拳昔常詠遺風著爲十六篇今來訪故宅森若君在前不慕樽有酒不

慕琴無絃慕君遺榮利老死此丘園柴桑古村落栗里
舊山川不見籬下菊但餘墟中煙子孫雖無聞族氏猶
未遷每逢姓陶人使我心依然

北亭

廬宮山下州湓浦沙邊宅宅北倚高岡迢迢數千尺上
有青青竹竹閒多白石茅亭居上頭豁達門四闢前楹
捲簾箔北牖施牀席江風萬里來吹我涼淅淅日高公
府歸巾笏隨手擲脫衣恣搔首坐臥任所適時傾一盃
酒曠望湖天夕口詠獨酌謠目送歸飛翮慙無出塵操
未免折腰役偶獲此閒居謬似高人跡

游湓水

四月未全熟麥涼江風秋湖山處處好最愛湓水頭湓
水從東來一派入江流可憐似縈帶中有隨風舟命酒
一臨汎捨鞍揚棹謳放迴岸傍馬去逐波閒鷗煙浪始
渺渺風襟亦悠悠初疑上河漢中若尋瀛洲汀樹綠拂
池沙草芳未休青蘿與紫葛枝蔓垂相樛繫纜步平岸
回頭望江州城雉映水見隱隱如蜃樓日入意未盡將
歸復少留到官行半歲今日方一遊此地來何暮可以
寫吾憂

答故人

故人對酒歎歎我在天涯見我昔榮遇念我今蹉跎
我爲司馬官意復如何答云且勿歎聽我爲君歌我本
蓬蒿人鄙賤劇泥沙讀書未百卷信口嘲風花自從筮
仕來六命三登科顧慙虛劣姿所得亦已多散員足庇
身薄俸可資家省分輒自愧豈爲不遇耶煩君對杯酒
爲我一咨嗟

官舍內新鑿小池

簾下開小池盈盈水方積中底鋪白沙四隅甃青石勿
言不深廣但足幽人適泛灑微雨朝泓澄明月夕豈無
大江外波浪連天白未如牀席閒方丈深盈尺清淺可

白集 卷之八 三
狎弄昏煩聊漱滌最愛曉暝時一片秋天白

宿簡寂觀

巖白雲尚屯林紅葉初隕秋光引閒步不知身遠近夕
投靈洞宿臥覺塵機泯名利心旣忘市朝夢亦盡暫來
尚如此况乃終身隱何以療夜飢一匙雲母粉

讀謝靈運詩

吾聞達士道窮通順冥數通乃朝廷來窮卽江湖去謝
公才廓落與世不相遇壯志鬱不用須有所洩處洩爲
山水詩逸韻諧奇趣大必籠天海細不遺草樹豈惟翫
景物亦欲攄心素往往卽事中未能忘興諭因知康樂

作不獨在章句

北亭獨宿

悄悄壁下牀紗籠耿殘燭夜半獨眠覺疑在僧房宿

約心

黑鬢絲雪侵青袍塵土浣

鳥臥切

兀兀復騰騰江城一上

佐朝就高齋上薰然負暄臥晚下小池前澹然臨水坐
已約終身心長如今日過

晚望

江城高角動沙洲夕鳥還獨坐高亭上西南望遠山

早春

雪消冰又釋景和風復暄滿庭田地濕齊葉生牆根宮
舍悄無事日西斜掩門不開莊老卷欲與何人言

春寢

何處春暄來微和生血氣氣薰肌骨暢東窓一昏睡是
時正月晦假日無公事爛熯不能休日午將及未緬思
少健日甘寢常自恣一從衰疾來枕上無此味

睡起晏坐

後亭晝眠足起坐春景暮新覺眼猶昏無思心正住淡
寂歸一性虛閒遺萬慮了然此時心無物可譬喻本是
無有鄉亦名不用處行禪與坐忘同歸無異路

道書云無何有

之鄉禪經云不用處
二者殊名而同歸

詠懷

盡日松下坐有時池畔行行立與坐臥中懷澹無營不
覺流年過亦任白髮生不爲世所薄安得遂閒情

春遊西林寺

下馬西林寺翛然進輕策朝爲公府吏暮作靈山客二
月匡廬北冰雪始消釋陽叢抽茗芽陰竇洩泉脈熙熙
風土暖藹藹雲嵐積散作萬壑春凝爲一氣碧身閒易

澹泊官散無牽迫緬彼十八人古今同此適

昔遠宗雷
等十八賢

同隱于
西林寺是年淮寇起處處興兵革智士勞思謀戎臣苦

白集 卷七 五
征役獨有不才者山中弄泉石

出山吟

朝詠遊仙詩暮歌采薇曲臥雲坐白石山中十五宿行
隨出洞水回別緣巖竹早晚重來遊心期瑤草綠

歲暮

已任時命去亦從歲月除中心一調伏外累盡空虛名
宦意已矣林泉計何如擬近東林寺溪邊結一廬

聞早鶯

日出眠未起屋頭聞早鶯忽如上林曉萬年枝上鳴憶
爲近臣時秉筆直承明春深視草暇旦暮聞此聲今聞

在何處寂寞潯陽城鳥聲信如一分別在人情不作天涯意豈殊禁中聽

栽杉

勁葉森利劍孤莖挺端標纔高四五尺勢若干青霄移栽東窓前愛爾寒不凋病夫臥相對日夕閒蕭蕭昨爲山中樹今爲簷下條雖然遇賞翫無乃近塵囂猶勝澗谷底埋沒隨衆樵不見鬱鬱松委質山上苗

過李生

蘋小蒲葉短南湖春水生子近湖邊佳靜境稱高情我爲郡司馬散拙無所營使君知性野衙退任閒行行攜

白集 卷上 八
小榼去逢花輒獨傾半酣到子舍下馬扣柴荆何以引
我步繞籬竹萬莖何以醒我酒吳音吟一聲須臾進野
飯飯稻茹芹英白甌青竹筴儉潔無羶腥欲去復徘徊
夕鴉已飛鳴何當重遊此待君湖水平

詠意

常聞南華經巧勞智憂愁不如無能者飽食但遨遊平
生愛慕道今日近此流自來潯陽郡四序忽已周不分
物黑白但與時沉浮朝飧夕安寢用是爲身謀此外卽
閒放時尋山水幽春遊慧遠寺秋上庾公樓或吟詩一
章或飲茶一甌身心一無繫浩浩如虛舟富貴亦有苦

苦在心危憂貧賤亦有樂樂在身自由

食笋

此州乃竹鄉春笋滿山谷山夫折盈抱抱來早市鬻物
以多爲賤雙錢易一束置之炊甑中與飯同時熟紫籜
拆故錦素肌擘新玉每食遂加飧經旬不思肉久爲京
洛客此味常不足且食勿踟躕南風吹作竹

遊石門澗

石門無舊徑披榛訪遺跡時逢山水秋清輝如古昔常
聞慧遠輩題詩此巖壁雲覆莓苔封蒼然無處覓蕭疎
野生竹崩剝多年石自從東晉後無復人遊歷獨有秋

澗聲潺湲空旦夕

招東鄰

小榼二升酒新簾六尺牀能來夜話否池畔欲秋涼

題元十八溪亭

亭在廬山東
南五老峯下

怪君不喜仕又遊煙霞里今日到幽居了然知所以宿
君石溪亭潺湲聲滿耳飲君螺盃酒醉臥不能起見君
五老峯益悔居城市愛君三男兒始歎身無子余方鑪
峯下結室爲居士山北與山東往來從此始

香鑪峯下新置草堂卽事詠懷題於石上

香鑪峯北面遺愛寺西偏白石何鑿鑿清流亦潺潺有

松數十株有竹千餘竿松張翠傘蓋竹倚青琅玕其下
無人居悠哉多歲年有時聚猿鳥終日空風煙時有沉
冥子姓白字樂天平生無所好見此心依然如獲終老
地忽乎不知遷架巖結茅宇斲壑開茶園何以洗我耳
屋頭飛落泉何以洗我眼砌下生白蓮左手攜一壺右
手挈五絃傲然意自足箕踞於其閒興酣仰天歌歌中
聊寄言言我本野夫誤爲世網牽時來昔捧日老去今
歸山倦鳥得茂樹涸魚反清源捨此欲焉往人閒多險
難

草堂前開一池養魚種荷日有幽趣

淙淙

祖紅切

三峽水浩浩萬頃陂未如新塘上微風動漣

漪小萍加汎汎初蒲正離離紅鯉二三寸白蓮八九枝

遶水欲成徑護堤方插籬已被山中客呼作白家池

白雲期

黃石巖下作

三十氣太壯胃中多是非六十身太老四體不支持四十至五十正是退閒時年長識命分心慵少營爲見酒興猶在登山力未衰吾年幸當此且與白雲期

登香爐峯

迢迢香爐峯心存耳目想終年牽物役今日方一往攀蘿蹋危石手足勞俯仰同遊三四人兩人不取上上到

峯之頂目眩心悅悅高低有萬尋濶狹無數丈不窮視
聽界焉識宇宙廣江水細如繩湓城小於掌紛吾何屑
屑未能脫塵鞅歸去思自嗟低頭入蟻壤

答崔侍郎錢舍人書問因繼以詩

旦暮兩蔬食日中一閒眠便是了一日如此已三年心
不擇時適足不揀地安窮通與遠近一貫無兩端常見
今之人其心或不然在勞則念息處靜已思喧如是用
身心無乃自傷殘坐輸憂惱使安得形神全吾有二道
友藹藹崔與錢同飛青雲路獨墮黃泥泉歲暮物萬變
故情何不遷應爲平生心與我同一源帝鄉遠於日美

人高在天誰謂萬里別常若在目前泥泉樂者魚雲路
遊者鸞勿言雲泥異同在逍遙閒因君問心地書後偶
成篇慎勿說向人人多笑此言

烹葵

昨臥不夕食今起乃朝炊貧厨何所有炊稻烹秋葵紅
粒香復軟綠英滑且肥飢來止於飽飽後復何思憶昔
榮遇日迨今窮退時今亦不凍餒昔亦無餘資口既不
減食身亦不減衣撫心私自問何者是榮衰勿學常人
意其閒分是非

小池二首

晝倦前齋熱晚愛小池清映林餘景沒近水微涼生坐
把蒲葵扇閒吟三兩聲

有意不在大湛湛方丈餘荷側瀉清露萍開見游魚每
一臨此坐憶歸青溪居

閉關

我心忘世久世亦不我干遂成一無事因得長掩關掩
關來幾時髣髴二三年著書已盈帙生子欲能言始悟
身易老復悲世多難迴顧趨時者役役塵壤間歲暮竟
何得不如且安閒

弄龜羅

有姪始六歲字之爲阿龜有女生三年其名曰羅兒一
始學笑語一能誦歌詩朝戲抱我足夜眠枕我衣汝生
何其晚我年行已衰物情小可念人意老多慈酒美竟
須壞月圓終有虧亦如恩愛緣乃是憂惱資舉世同此
累吾安能去之

截樹

種樹當前軒樹高柯葉繁惜哉遠山色隱此蒙籠間一
朝持斧斤手自截其端萬葉落頭上千峯來面前忽似
決雲霧豁達觀青天又如所念人久別一欸顏始有清
風至稍見飛鳥還開懷東南望目遠心遼然人各有偏

好物莫能兩全豈不愛柔條不如見青山

望江樓上作

江畔百尺樓樓前千里道憑高望平遠亦足舒懷抱驛
路使憧憧關防兵草草及茲多事日尤覺閒人好我年
過不惑休退誠非早從此拂塵衣歸山未爲老

題座隅

手不任執爿

尚朱切

肩不能荷鋤量力揆所用曾不敵一

夫幸因筆硯功得升仕進途歷官凡五六祿俸及妻孥
左右有兼僕出入有單車自奉雖不厚亦不至飢飭若
有人及此傍觀爲何如雖賢亦爲幸况我鄙且愚伯夷

古賢人魯山亦其徒時哉無奈何俱化爲餓殍

音夫元魯山

居阻水食絕而終

念彼益自愧不敢忘斯須平生榮利心破滅

無遺餘猶恐塵妄起題此於座隅

昔與微之在朝日因蓄休退之心迨今十年淪

落老大追尋前約且結後期

往子爲御史伊余忝拾遺皆逢盛開代俱登清近司予
繫玉爲珮子曳繡爲衣從容香煙下同侍白玉墀朝見
寵者辱暮見安者危紛紛無退者相顧令人悲宦情君
早厭世事我深知常於榮顯日已約林泉期况今各流
落身病齒髮衰不作臥雲計攜手欲何之待君女嫁後

及我官滿時稍無骨肉累粗有漁樵資歲晚青山路白
首期同歸

垂釣

臨水一長嘯忽思十年初三登甲乙第一入承明廬浮
生多變化外事有盈虛今來伴江叟沙頭坐釣魚

晚燕

百鳥乳雛畢秋燕獨蹉跎去社日已近啣泥意如何不
悟時節晚徒施工用多人間事亦爾不獨燕營窠

贖雞

清晨臨江望水禽正誼繁鳬鴈與鷗鷺游颺戲朝暾

音吞

適有鬻雞者挈之來遠村飛鳴彼何樂窘束此何冤喔
喔十四雛罩縛同一樊足傷金距蹢頭搶花冠翻經宿
費飲啄日高詣屠門遲迴未死閒飢渴欲相吞常慕古
人道仁信及魚豚見茲生惻隱贖放雙林園開籠解索
時雞雞聽我言與爾鎚三百小惠何足論莫學啣環雀
崎嶇謾報恩

秋日懷杓直

時杓直出
牧澧州

晚來天色好獨出江邊步憶與李舍人曲江相近住常
云遇清景必約同幽趣若不訪我來還須覓君去開眉
笑相見把手期何處西寺老胡僧南園亂松樹攜持小

酒榼吟詠新詩句同出復同歸從朝直至暮風雨忽消
散江山眇回互潯陽與涪陽相望空雲霧心期自乖曠
時景還如故今日郡齋中秋光誰共度

食後

食罷一覺睡起來兩甌茶舉頭看日影已復西南斜樂
人惜日促憂人厭年賒無憂無樂者長短任生涯

齊物二首

青松高百尺綠蕙低數寸同生大塊間長短各有分長
者不可退短者不可進若用此理推窮通兩無悶

椿壽八千春槿花不經宿中間復何有冉冉孤生竹竹

身三年老竹色四時綠雖謝椿有餘猶勝槿不足

山下宿

獨到山下宿靜向月中行何處水邊碓夜春雲母聲

題舊寫真圖

我昔三十六寫貌在丹青我今四十六衰頽臥江城豈
比十年老曾與衆苦并一照舊圖畫無復昔儀形形影
默相顧如弟對老兄况使他人見能不昧平生義和鞭
日走不爲我少停形骸屬日月老去何足驚所恨凌煙
閣不得畫功名

閒居

肺病不飲酒眼昏不讀書端然無所作身意閒有餘雞
棲籬落晚雪映林木疎幽獨已云極何必山中居

對酒示行簡

今旦一樽酒歡暢何怡怡此樂從中來他人安得知兄
弟唯二人遠別恒苦悲今春自巴峽萬里平安歸復有
雙幼妹笄年未結褵鄰溪切昨日嫁娶畢良人皆可依憂
念兩消釋如刀斷羈縻身輕心無繫忽欲凌空飛人生
苟有累食肉常如飢我心既無苦飲水亦可肥行簡勸
爾酒停盃聽我辭不歎鄉國遠不嫌官祿微但願我與
爾終老不相離

詠懷

冉求與顏淵卞和與馬遷或罹天天極或被人刑殘顧
我信爲幸百骸且完全五十不爲夭吾今欠數年知分
心自足委順身常安故雖窮退日而無戚戚顏昔有榮
先生從事於其間今我不量力舉心欲攀援窮通不由
已歡戚不由天命卽無奈何心可使泰然且務由已者
省躬諒非難勿問由天者天高難與言

夜琴

蜀琴木性實楚絲音韻清調慢彈且緩夜深十數聲入
耳淡無味愜心潛有情自弄還自罷亦不要人聽

山中獨吟

人各有一癖我癖在章句萬緣皆已消此病獨未去每
逢美風景或對好親故高聲詠一篇恍若與神遇自爲
江上客半在山中住有時新詩成獨上東巖路身倚白
石崖手攀青桂樹狂吟驚林壑猿鳥皆窺覷恐爲世所
嗤故就無人處

達理二首

何物壯不老何時窮不通如彼音與律宛轉旋爲宮我
命獨何薄多悴而少豐當壯已先衰暫泰還長窮我無
奈命何委順以待終命無奈我何方寸如虛空曹然與

化俱混然與俗同誰能坐此苦齟齬於其中

舒姑化爲泉牛哀病作虎或柳生肘閒或男變爲女鳥
獸及水木本不與民伍胡然生變遷不待死歸土百骸
是已物尚不能爲主况彼時命閒倚伏何足數時來不
可遏命去焉能取唯當養浩然吾聞達人語

湖亭晚望殘水

湖上秋次

呼決切

寥湖邊晚蕭瑟登亭望湖水水縮湖底

出清渟得早霜明滅浮殘日流注隨地勢窪

鳥瓜切於交

切無定質泓澄白龍臥宛轉青蛇屈破鏡折劍頭光芒

又非一久爲山水客見盡幽奇物及來湖亭望此狀難

談悉乃知天地間勝事殊未畢

郭虛舟相訪

朝暖就南軒暮寒歸後屋
晚酌一兩盃夜碁三數局
寒灰埋暗火曉焰凝殘燭
不嫌貧冷人時來同一宿

巳集

卷之十

一

白氏長慶集卷第八

唐太子少傅刑部尚書致仕贈尚書右僕射太原

曰居易樂天著

明後學松江馬元調巽甫校

閒適四

古調詩五言凡五十七首

長慶二年七月自中書舍人出守杭州路次藍

溪作

自此後詩俱赴杭州時作

太原一男子自顧庸且鄙老逢不次恩洗拔出泥滓既
居可言地願助朝廷理伏閣三上章戇愚不稱旨聖人
存大體優貸容不死鳳詔停舍人魚書除刺史真懷齊

寵辱委順隨行止我自得此心于茲十年矣餘杭乃名

郡郡郭臨江汜

詳子切

已想海門山潮聲來入耳昔予貞

元末羈旅曾遊此甚覺太守尊亦諳魚酒美因生江海
興每羨滄浪水尙擬拂衣行況今兼祿仕青山峰巒接
白日煙塵起東道旣不通改轅遂南指自秦窮楚越浩
蕩五千里聞有賢主人而多好山水是行頗爲愜所歷
良可紀策馬渡藍溪勝遊從此始

初出城留別

朝從紫禁歸暮出青門去勿言城東陌便是江南路揚
鞭簇車馬揮手辭親故我生本無鄉心安是歸處

過駱山人野居小池

駱生棄官居此二十餘年

茅覆環堵亭泉添方丈沼紅芳照水荷白頸觀魚鳥
峯石苔蒼翠尺波煙杳眇但問有意無勿論池大小
門前車馬路奔走無昏曉名利驅人心賢愚同擾擾
善哉駱處士安置身心了何乃獨多君丘園居者少

宿清源寺

往謫潯陽去夜憇朝溪曲今爲錢塘行重經茲寺宿
爾來幾何歲溪草二八綠不見舊房僧蒼然新樹木
虛空走日月世界遷陵谷我生寄其間孰能逃倚伏
隨緣又南去好住東廊竹

宿藍溪對月

昨夜鳳池頭今夜藍溪口明月本無心行人自回首新
秋松影下半夜鐘聲後清影不宜昏聊將茶代酒

自望秦赴五松驛馬上偶睡睡覺成吟

長途發已久前館行未至體倦目已昏

克盍切

然遂成

睡右袂尚垂鞭左手暫委轡忽覺問僕夫纔行百步地
形神分處所遲速相乖異馬上幾多時夢中無限事誠
哉達人語百齡同一寐

鄧州路中作

蕭蕭誰家村秋梨葉半拆漠漠誰家園秋韭花初白路

逢故里物使我嗟行役不歸渭北村又作江南客去鄉
徒自苦濟世終無益自問波上萍何如澗中石

朱藤杖紫驄馬吟

拄上山之上騎下山之下江州去日朱藤杖忠州歸日
紫驄馬天生二物濟我窮我生合是栖栖者

桐樹館重題

堦前下馬時梁上題詩處慘澹病使君蕭疎老松樹自
嗟還自哂又向杭州去

過紫霞蘭若

我愛此山頭及此三登歷紫霞舊精舍寥落空泉石朝

市日喧隘雲林長悄寂猶存住寺僧肯有歸山客

感舊紗帽

帽卽故李侍郎所贈

昔君烏紗帽贈我白頭翁帽今在頂上君已歸泉中物
故猶堪用人亡不可逢岐山今夜月墳樹正秋風

思竹窓

不憶西省松不憶南宮菊

西省大院有松南宮本廳有菊

惟憶新昌堂

蕭蕭北窓竹窓閒枕簟在來後何人宿

馬上作

處世非不遇榮身頗有餘勲爲上柱國爵乃朝大夫自
問有何才兩入承明廬又問有何政再駕朱輪車矧予

東山人自性朴且疎彈琴復有酒但慕嵇阮徒聞被鄉
里薦誤上賢能書一列朝士籍遂爲世網拘高有曾繳
憂下有陷穽虞每覺宇宙窄未嘗心體舒蹉跎二十年
領下生白鬚何言左遷去尚獲專城居杭州五千里往
若投淵魚雖未脫簪組且來泛江湖吳中多詩人亦不
少酒沽高聲詠篇什大笑飛杯盃五十未全老尚可且
歡娛用茲送日月君以爲何如秋風起江上白日落路
隅回首語五馬去矣勿踟躕

秋蝶

秋花紫蒙蒙秋蝶黃茸茸

而中切

花低蝶新小飛戲叢西

東日暮涼風來紛紛花落叢夜深白露冷蝶已死叢中
朝生夕已死氣類各相從不見千年鶴多棲百丈松

登商山最高頂

高高此山頂四望唯煙雲下有一條路通達楚與秦或
名誘其心或利牽其身乘者與負者來去何紛紜我亦
斯人徒未能出囂塵七年三往復何得笑他人

枯桑

道傍老枯樹枯來非一朝皮黃外尚活心黑中先焦似
有多憂者非因外火燒

山路偶興

筋力未全衰僕馬不至弱又多山水趣心賞非寂寞捫
蘿上煙嶺蹋石穿雲壑谷鳥晚仍啼洞花秋不落提籠
復攜榼遇勝時停泊泉憇茶數甌嵐行酒一酌獨吟還
獨笑此興殊未惡假使在城時終年有何樂

山雉

五步一啄草十步一飲水適性遂其生時哉山梁雉梁
上無罾繳梁下無鷹鷂雌雄與群雛皆得終天年嗟嗟
籠下雞及彼池中鴈既有稻梁恩必有犧牲患

初下漢江舟中作寄兩省給舍

秋水浙紅粒朝煙烹白鱗一食飽至夜一臥安達晨晨

白集 卷之八 五
無朝謁勞夜無直宿勤不知兩掖客何似扁舟人尚想
到郡日且稱守土臣猶須副憂寄恤隱安疲民暮年庶
報政三年當退身終使滄浪水濯吾纓上塵

自蜀江至洞庭湖口有感而作

江從西南來浩浩無旦夕長波逐若瀉連山鑿如劈千
年不壅潰萬姓無墊溺不爾民爲魚大哉禹之績導岷
切既艱遠距海無咫尺胡爲不訖功湖水斯委積洞

庭與青草大小兩相蔽混合萬丈深渺茫千里白每

歲秋夏時浩大吞七澤水族窟穴多農人土地窄我今

尚嗟嘆禹豈不愛惜邈未究其由想古觀遺跡疑此苗

人頑恃嶮不終役帝亦無奈何留患與今昔水流天地
內如身有血脈滯則爲疽疣治之在鍼石安得禹復生
爲唐水官伯手提倚天劍重來親指畫疏河似剪紙決
壅如裂帛滲作膏腴田蹋平魚鼈宅龍宮變閭里水府
生禾麥坐添百萬戶書我司徒籍

初領郡政衙退登東樓作

自此後詩到
杭州後作

鰥惇心所念簡牘手自操何言符竹貴未免州縣勞賴
是餘杭郡臺榭遶官曹凌晨親政事向晚恣遊遨山冷
微有雪波平未生濤水心如鏡面千里無纖毫直下江
最闊近東樓更高煩襟與滯念一望皆遁逃

清調吟

索索風戒寒沉沉日藏耀勸君飲濁醪聽我吟清調芳
節變窮陰朝光成夕照與君生此世不合長年少今晨
從此遊明日安能料若不結跏禪卽須開口笑

狂歌詞

明月照君席白露霑我衣勸君酒杯滿聽我狂歌詞五
十已後衰二十已前癡晝夜又分半其間幾何時生前
不歡樂死後有餘資焉用黃墟下珠衾玉匣爲

郡亭

平旦起視事亭午臥掩關除親簿領外多在琴書前况

有虛白亭坐見海門山潮來一凭檻賓至一開筵終朝
對雲水有時聽管絃持此聊過日非忙亦非閒山林太
寂寞朝闕空喧煩唯茲郡閣內翳靜得中間

詠懷

昔爲鳳閣郎今爲二千石自覺不如今人言不如昔昔
雖居近密終日多憂惕有詩不敢吟有酒不敢喫今雖
在疎遠竟歲無牽役飽食坐終朝長歌醉通夕人生百
年內疾速如過隙先務身安閒次要心歡適事有得而
失物有損而益所以見道人觀心不觀跡

立春後五日

立春後五日春態紛婀娜

鳥可切 娜奴可切

白日斜漸長碧雲

低欲墮殘冰拆玉片新萼排紅顙遇物盡欣欣愛春非

獨我迎芳後園立就暖前簷坐還有惆悵心欲別紅爐

火

郡中卽事

漫漫潮初平熙熙春日空闊遠江山清明好天氣外
有適意物中無繫心事數篇對竹吟一杯望雲醉行攜
杖扶力臥讀書取睡久養病形骸深諳閒氣味遙思九
城陌擾擾趨名利今朝是雙日朝謁多軒騎寵者防悔
尤權者懷憂畏爲報高車蓋恐非真富貴

郡齋暇日辱常州陳郎中使君早春晚坐水西

館書事詩十六韻見寄亦以十六韻酬之

新年多暇日晏起褰簾坐睡足心更慵日高頭未裹徐
傾下藥酒稍蕪煎茶火誰伴寂寥身無絃琴在左遙思
毘陵官春深物嫋娜波拂黃柳梢風搖白梅朵衙門排
曉戟鈴閣開朝鎖太守水西來朱衣垂素舸賈我切良辰
不易得佳會無由果五馬正相望雙魚忽前墮魚中獲
瑰寶持翫何磊砢郎果切一百六十言字字靈珠顆苦果切
上申心欵曲下敘時軼苦紺切軻口我切才富不如君道孤
還似我敢辭官遠慢且貴身安妥勿復問榮枯冥心無

不可

官舍

高樹換新葉陰陰覆地隅何言太守宅有似幽人居太
守臥其下閒慵兩有餘起嘗一甌茗行讀一卷書早梅
結青實殘櫻落紅珠稚女弄庭果嬉戲一作牽人裾是
日晚彌靜巢禽不相呼嘖嘖護兒鵲啞啞母子鳥豈唯
云鳥爾吾亦引吾雛

吾雛

吾雛字阿羅阿羅纔七齡嗟吾不才子憐爾無弟兄撫
養雖驕騃性識頗聰明學母畫眉樣効吾詠詩聲我齒

今欲墮汝齒昨始生我頭髮盡落汝頂髻初成老幼不相待父衰汝孩嬰緬想古人心慈愛亦不輕蔡邕念文姬于公歎緹縈敢求得汝力但未忘父情

題小橋前新竹招客

鴈齒小紅橋垂簷低白屋橋前何所有苒苒新生竹皮開拆褐錦節露抽青玉筠翠如可殮粉霜不忍觸閒吟聲未已幽翫心難足管領好風煙輕欺凡草木誰能有月夜伴我林中宿爲君傾一杯狂歌竹枝曲

病中逢秋招客夜酌

不見詩酒客臥來半月餘合和新藥草尋檢舊方書晚

霽煙景度早涼牕戶虛雪生衰鬢久秋入病心初臥簟
斲竹涼風襟邛葛疎夜來身校健小飲復如何

食飽

食飽拂枕臥睡足起閒吟淺酌一杯酒緩彈數聲琴旣
可暢情性亦足傲光陰誰知名利盡無復長安心

嚴十八郎中在郡日改制東南樓因名清輝未
立標榜徵歸郎署予旣到郡性愛樓居宴遊
其閒頗有幽致聊成十韻兼戲寄嚴

嚴郎制茲樓立名曰清輝未及署花榜遽徵還粉闥去
來三四年塵土登者稀今春新太守洒掃施簾幃院柳

煙婀娜簷花雪霏微看山倚前戶待月闌東扉碧窓憂
瑤瑟朱闌飄舞衣燒香捲幕坐風燕雙雙飛君作不得
住我來幸因依始知天地閒靈境有所歸

南亭對酒送春

含桃實已落紅薇花尚薰冉冉三月盡晚鶯城上聞獨
持一杯酒南亭送殘春半酣忽長歌歌中何所云云我
五十餘未是苦老人刺史二千石亦不爲賤貧天下三
品官多老於我身同年登第者零落無一分親故半爲
鬼僮僕多見孫念此聊自解逢酒且歡欣

翫新庭樹因詠所懷

霽霽四月初新樹葉成陰動搖風景麗蓋覆庭院深下有無事人竟日此幽尋豈唯翫時物亦可開煩襟時與道人語或聽詩客吟度春足芳色入夜多鳴禽偶得幽閒境遂忘塵俗心始知真隱者不必在山林

仲夏齋戒月

仲夏齋戒月三旬斷腥羶自覺心骨爽行起身翩翩始知絕粒人四體更輕便初能脫病患久必成神仙禦寇馭冷風赤松游紫煙常疑此說謬今乃知其然我年過半百氣衰神不全已垂兩鬢絲難補三丹田但減葷血味稍結清淨緣脫巾且修養聊以終天年

除官去未閒

除官去未閒半月恣遊計朝尋霞外寺暮宿波上島新
樹少於松平湖半連草躋攀有次第賞翫無昏早有時
騎馬醉兀兀冥天造窮通與生死其奈吾懷抱江山信
爲美齒髮行將老在郡誠未厭歸鄉去亦好

三年爲刺史二首

三年爲刺史無政在人口唯向郡城中題詩十餘首慙
非甘棠詠豈有人思否

三年爲刺史飲水復食蘗唯向天竺山取得兩片石此
抵有千金無乃傷清白

別萱桂

使君竟不住萱桂徒栽種桂有留人名萱無忘憂用不
如江畔月步步來相送

自餘杭歸宿淮口作

爲郡已多暇猶少勤吏職罷郡更安閒無所勞心力舟
行明月下夜泊清淮北豈止吾一身舉家同燕息三年
請祿俸頗有餘衣食乃至僮僕閒皆無凍餒色行行弄
雲水步步近鄉國妻子在我前琴書在我側此外吾不
知於焉心自得

舟中李山人訪宿

日暮舟悄悄煙生水沉沉何以延宿客夜酒與秋琴來
客道門子來自松高岑軒軒舉雲貌豁豁開清襟得意
言語斷入絃滋味深默然相顧哂心適而忘心

洛下卜居

三年典郡歸所得非金帛天竺石兩片華亭鶴一隻飲
啄供稻梁包裹用茵席誠知是勞費其奈心愛惜遠從
餘杭郭同到洛陽陌下擔拂雲根開籠展霜翮貞姿不
可雜高性宜其適遂就無塵坊仍求有水宅東南得幽
境樹老寒泉碧池畔多竹陰門前少人跡未請中庶祿
且脫雙驂易

買履道宅價不足
因以兩馬償之

豈獨爲身謀安吾鶴與

石

洛中偶作

自此後在東都作

五年職翰林四年蒞潯陽一年巴郡守半年南宮郎二年直綸閣三年刺史堂凡此十五載有詩千餘章境與周萬象土風備四方獨無洛中作能不心悵悵魯堂切今爲春宮長始來遊此鄉徘徊伊澗上睥睨嵩少傍遇物輒一詠一詠傾一觴筆下成釋憾卷中同補亡往往顧自哂眼昏鬢蒼蒼不知老將至猶自放詩狂

贈蘇少府

籍甚二十年今日方欸顏相送嵩洛下論心杯酒間何

爲懶出入府寮多閉關蒼髮彼此老白日尋常閒朝欲
攜手出暮思聯騎還何當挈一榼同宿龍門山

移家入新宅

移家入新宅罷郡有餘資既可避燥濕復免憂寒飢疾
平未還假官閒得分司幸有俸祿在而無職役羈清旦
盥漱畢開軒卷簾幃家人及雞犬隨我亦熙熙取興不
過酒放情或作詩何必苦修道此卽是無爲外累信已
遣中懷時有思有思一何遠默坐低雙眉十載囚竄客
萬里征戍兒春朝鑠籠鳥冬夜支牀龜驛馬走四蹄痛
酸無歇期磨魚胃切牛封兩目昏閉何人知誰能脫放

白集 卷之八 十三
去四散任所之名得適其性如吾今日時

琴

置琴曲几上慵坐但含情何煩故揮弄風絃自有聲

鶴

人各有所好物固無常宜誰謂爾能舞不如閒立時

自詠

夜鏡隱白髮朝酒發紅顏可憐假年少自笑須臾閒朱
砂賤如土不解燒爲丹玄鬢化爲雪未聞休得官咄哉
箇丈夫心性何墮頑但遇詩與酒便忘寢與飧高聲發
吟似得詩中仙引滿飲一杯盡忘身外緣昔有醉先

生席地而幕天于今居處在許我當中眠眠罷又一酌
酌罷又一篇回面顧妻子生計方落然誠知此事非又
過知非年豈不欲自改改卽心不安且向安處去其餘
皆老閒

林下閒步寄皇甫庶子

扶杖起病初策馬力未任旣懶出門去亦無客來尋以
此遂成閒閒步遶園林天曉煙景淡樹寒鳥雀深一酌
池上酒數聲竹閒吟寄言東曹長當知幽獨心

晏起

鳥鳴庭樹上日照屋簷時老去慵轉極寒來起猶遲厚

薄被適性高低枕得宜神安體穩暖此味何人知睡足
仰頭坐兀然無所思如未鑿七竅若都遺四肢緬想長
安客早朝霜滿衣彼此各自適不知誰是非

池畔二首

結構池西廊疏理池東樹此意人不知欲爲待月處
持刀剝古火切密竹竹少風來多此意人不會欲令池有
波

春葺新居

江州司馬日忠州刺史時栽松滿後院種柳陰前墀彼
皆非吾土栽種尚忘疲况茲是我宅葺藝固其宜平旦

領僕使乘春親指揮移花夾暖室徙竹覆寒池池水變
綠色池芳動清輝尋芳弄水坐盡日心熙熙一物苟可
適萬緣都若遺設如宅門外有事吾不知

贈言

捧籬獻千金彼金何足道臨觴贈一言此言真可寶流
光我已晚適意君不早况君春風面柔促如芳草二十
方長成三十向衰老鏡中桃李色不得十年好胡爲坐
脈脈不肯傾懷抱

泛春池

白蘋湘渚曲綠篠

先了切

剡溪口各在天一涯信美非吾

有如何此庭內水竹交左右霜竹百千竿煙波六七畝
泓澄動堦砌淡泞支呂切映戶牖蛇皮細有紋鏡面清無
垢主人過橋來雙童扶一叟恐汚清冷波塵纓先抖擻
波上一葉舟舟中一樽酒酒開舟不繫去去隨所偶或
遶蒲浦前或泊桃島後未撥落杯花低衝拂面柳半酣
迷所在倚榜兀回首不知此何處復是人寰否誰知始
疏鑿幾主相傳受楊家去云遠田氏將非久天與愛水
人終焉落吾手

此池始楊常侍開鑿中閒田氏爲主
予今有之蒲浦桃島皆池上所有

白氏長慶集卷第九

唐太子少傅刑部尚書致仕贈尚書右僕射太原

白居易樂天著

明後學松江馬元調異甫校

感傷一

古調詩五言凡五十五首

西明寺牡丹花時憶元九

前年題名處今日看花來一作芸香吏三見牡丹開豈
獨花堪惜方知老闇催何況尋花伴東都去未廻詎知
紅芳側春盡思悠哉

傷楊弘貞

顏子昔短命仲尼惜其賢楊生亦好學不幸復徒然一作

然今復

誰識天地意獨與龜鶴

蛇一作年

權攝昭應早秋書事寄元拾遺兼呈李司錄

夏閏秋候早七月風騷騷渭川煙景晚驪山宮殿高
丹殿子司諫赤縣我徒勞相去半日程不得同遊遨到官
來十日覽鏡生二毛可憐趨走吏塵土滿青袍郵傳擁
兩驛簿書堆六曹爲問綱紀掾何必使鉛刀

新栽竹

佐邑意不適閉門秋草生何以娛野性種竹百餘莖見
此溪上色憶得山中情有時公事暇盡日遶欄行勿言

根未固勿言陰未成已覺庭宇內稍稍有餘清最愛近
牕臥秋風枝有聲

秋霖中過尹縱之仙遊山居

慘慘八月暮連連三日霖邑居尚愁寂况乃在山林林
下有志士苦學惜光陰歲晚千萬慮併入方寸心巖鳥
共旅宿草蟲伴愁吟秋天牀席冷雨夜燈火深憐君寂
寞意攜酒一相尋

寄江南兄弟

分散骨肉戀趨馳名利牽一奔塵埃馬一汎風波船忽
一手時憫然秋風前別來朝復夕積日成七年花落

城中池春深江上天登樓東南望鳥滅煙蒼然相去復
幾許道里近三千平地猶難見况乃隔山川

曲江早秋

三年作

秋波紅蓼水夕照青蕪岸獨信馬蹄行曲江池四畔早
涼晴後至殘暮暝來散方喜炎燠清復嗟時節換我年
三十六冉冉昏復旦人壽七十稀七十新過半且當對
酒笑勿起臨風歎

寄題盤屋廳前雙松

兩松自仙遊山移植縣廳

憶昨爲吏日折腰多苦辛歸家不自適無計慰心神手
栽兩樹松聊以當嘉賓春來日一往生意漸欣欣清韻

度秋在綠茸隨日新始憐澗底色不憶城中春有時畫
掩關雙影對一身盡日不寂寞意中如三人忽奉宣室
詔徵爲文苑臣閒來一惆悵長似別交親早知煙翠前
攀翫不逡巡悔從白雲裏移爾落囂塵

翰林院中感秋懷王質夫

王居仙
遊山

何處感時節新蟬禁中聞宮槐有秋意風夕花紛紛寄
跡鴛鴦行歸心鷗鶴群唯有王居士知予憶白雲何日
仙遊寺潭前秋見君

禁中月

海上明月出禁中清夜長東南樓殿白稍稍上宮牆淨

落金塘水明浮玉砌霜不比人間見塵土污清光

贈賣松者

一束蒼蒼色如從澗底來
斲掘經幾日枝葉滿塵埃
不買非他意城中無地栽

初見白髮

白髮生一莖朝來明鏡裏
勿言一莖少滿頭從此始
青山方遠別黃綬初從仕
未料容鬢閒蹉跎忽如此

別元九後詠所懷

零落桐葉雨蕭條槿花風
悠悠早秋意生此幽閒中
况與故人別中懷正無悰
徂紅切樂也勿云不相送
心到青門

東相知豈在多但問同不同同心一人去坐覺長安空
禁中秋宿

風翻朱裏幕雨冷通中枕耿耿背斜燈秋牀一人寢

早秋曲江感懷

離離暑雲散嫋嫋涼風起池上秋又來荷花半成子朱
顏易消歇白日無窮已人壽不如山年光急於水青蕪
與紅蓼歲歲秋相似去歲此悲秋今我復來此

寄元九

身爲近密拘心爲名檢縛月夜與花時少逢杯酒樂唯
有元夫子閒來同一酌把手或酣歌展眉時笑謔今春

除御史前月之東洛別來未開顏
塵埃滿樽杓蕙風晚
香盡槐雨餘花落秋意一蕭條
離容兩寂寞况隨白日
老共負青山約誰識相念心
羈鷹與籠鶴

春暮寄元九

梨花結成實燕卵化爲雛
時物又若此道情復何如
但覺日月促不嗟年歲徂
浮生都是夢老小亦何殊
雖與故人別江陵初謫居
時時一相見此意未全除

早梳頭

夜沐早梳頭
牕明秋鏡曉
颯然握中髮
一沐知一少年
事漸蹉跎
世緣方繳繞
不學空門法
老病何由了
未得

無生心白頭亦爲天

出關路

山川函谷路塵土游子顏蕭條去國意秋風生故關

別舍弟後月夜

悄悄初別後去住兩盤桓行子孤燈店居人明月軒平生共貧苦未必日成歡及此暫爲別懷抱已憂煩況是庭葉盡復思山路寒如何爲不念馬瘦衣裳單

新豐路逢故人

塵土長路晚風煙廢宮秋相逢立馬語盡日此橋頭知君不得意鬱鬱來西遊惆悵新豐店何人識馬周

金鑾子晬日

晬將遂切子
生一歲曰晬

行年欲四十有女曰金鑾生來始周歲學坐未能言慙
非達者懷未免俗情憐從此累身外徒云慰目前若無
夭折患則有婚嫁牽使我歸山計應遲十五年

青龍寺早夏

塵埃經小雨地高倚長坡日西寺門外景氣含清和閒
有老僧立靜無凡客過殘鷺意思盡新葉陰涼多春去
來幾日夏雲忽差我朝朝感時節年鬢闌蹉跎胡爲戀
朝市不去歸煙蘿青山寸步地自問心如何

秋題牡丹叢

晚叢白露夕衰葉涼風朝紅艷久已歇碧芳今亦銷幽
人坐相對心事共蕭條

勸酒寄元九

薤葉有朝露槿枝無宿花君今亦如此促促生有涯既
不逐禪僧林下學楞伽又不隨道士山中煉丹砂百年
夜分半一歲春無多何不飲美酒胡然自悲嗟俗號消
愁藥神速無以加一杯驅世慮兩杯反天和三杯卽酩
酊或笑任狂歌陶陶復兀兀吾孰知其他況在名利途
平生有風波深心藏陷穽巧言織網羅舉目非不見不
醉欲如何

曲江感秋

五年作

沙草新雨地，
柳涼風枝。
三年感秋思，
併在曲江池。
早蟬已嘹唳，
連條切晚荷復離披。
前秋去秋思，
一一生此時。
昔人三十二秋興，
已云悲我今。
欲四十秋懷，
亦可知歲月不虛設。
此身隨日衰，
闇老不自覺。
直到鬢成絲。

酬張太祝晚秋臥病見寄

高才淹禮寺，
短羽翔禁林。
西街居處遠，
北闕官曹深。
君病不來訪，
我忙難往尋。
差池終日別，
寥落經年心。
露濕綠蕪地，
月寒紅樹陰。
况茲獨愁夕，
聞彼相思吟。
上言歡笑阻，
下嗟時歲侵。
容衰晚牕鏡，
思苦秋絃琴。
一章錦繡

段八韻瓊瑤音何以報珍重慙無雙南金

立秋日曲江憶元九

下馬柳陰下獨上堤上行故人千萬里新蟬三兩聲城
中曲江水江上江陵城兩地新秋思應同此日情

早朝賀雪寄陳山人

長安盈尺雪早朝賀君喜將赴銀臺門始出新昌里上
堤馬蹄滑中路蟠燭死十里向北行寒風吹破耳待漏
午門外候對三殿裏鬚鬢凍生冰衣裳冷如水忽思仙
遊谷閣謝陳居士暖覆褐裘眠日高應未起

初與元九別後忽夢見之及寤而書適至兼寄

桐花詩悵然感懷因以此寄

元九初
謫江陵

永壽寺中語新昌坊北分歸來數行淚悲事不悲君悠
悠藍田路自去無消息計君食宿程已過商山北昨夜
雲四散千里同月色曉來夢見君應是君相憶夢中握
君手問君意何如君言苦相憶無人可寄書覺來未及
說叩門聲襲襲言是商州使送君書一封枕上忽驚起
顛倒着衣裳開緘見手扎一紙十三行上論遷謫心下
說離別腸心腸都未盡不暇敘炎涼云作此書夜夜宿
商州東獨對孤燈坐陽城山館中夜深作書畢山月向
西斜月前何所有一樹紫桐花桐花半落時復道正相

思殷勤書背後兼寄桐花詩桐花詩八韻思緒一何深
以我今朝意憶君此夜心一章一遍讀一句十回吟珍
重八十字字字化爲金

和元九悼往

感舊蚊
惆作

美人別君去自去無處尋舊物零落盡此情安可任唯
有禪

胡結切

紗幌塵埃日夜侵馨香與顏色不似舊時深

透影燈耿耿籠光月沉沉中有孤眠客秋涼生夜衾舊
宅牡丹院新墳松木林夢中咸陽淚覺後江陵心含此
隔年恨發爲中夜吟無論君自感聞者欲沾巾

重到渭江舊居

舊居清渭曲開門當蔡渡十年方一還幾欲迷歸路追
思昔日行感傷故游處插柳作高林種桃成老樹因驚
成人者盡是舊童孺試問舊老人半爲遶村墓浮生同
過客前後遞來去白日如弄珠出入光不住人物日改
變舉目悲所遇回念念我身安得不衰暮朱顏銷不歇
白髮生無數唯有山門外三峰色如故

白髮

白髮知時節闇與我有期今朝日陽裏梳落數莖絲家
人不慣見憫默爲我悲我云何足怪此意爾不知凡人
年三十外壯中已衰但思寢食味已減二十時况我年

四十本來形貌羸書魔昏兩眼酒病沉四肢親愛日零
落在者仍別離身心久如此白髮生已遲由來生老死
三病長相隨除却念無生人閒無藥治

秋日

池殘寥落水牕下悠揚日嫋嫋秋風多槐花半成實下
有獨立人年來四十一

將之饒州江浦夜泊

明月滿深浦愁人獨臥舟煩寃寢不得夏夜長於秋苦
乏衣食資遠爲江海游光陰坐遲暮鄉國行阻修身病
向鄱陽家貧寄徐州前事與後事豈堪心併憂憂來起

長望但見江水流
雲樹藹蒼蒼
煙波淡悠悠
故園迷處所
一望堪白頭

思歸

時初爲校書郎

養無晨昏膳
隱無伏臘資
遂求及親祿
僂俛來京師
薄俸未及親
別家已經時
冬積溫席戀
春違采蘭期
夏至一陰生
稍稍夕漏遲
塊然抱愁者
長夜獨先知
悠悠鄉關路
夢去身不隨
坐惜時節變
蟬鳴槐花枝

冀城北原作

野色何莽蒼
去聲秋聲亦蕭疎
風吹黃埃起
落日驅征車
何代此開國
封疆百里餘
古今不相待
朝市無常居
昔

人城邑中今變爲丘墟昔人墓田中今化爲里閭廢興
相催迫日月互居諸世變無遺風焉能知其初行人千
載後懷古空躊躇

客路感秋寄明準上人

日暮天地冷雨霽山河清長風從西來草木凝秋聲已
感歲倏忽復傷物周零孰能不潛懷天時牽人情借問
空門子何法易修行使我忘得心不教煩惱生

游襄陽懷孟浩然

楚山碧巖巖漢水碧湯湯秀氣結成象孟氏之文章今
我諷遺文思人至其鄉清風無人繼日暮空襄陽南望

鹿門山藹若有餘芳舊隱不知處雲深樹蒼蒼

秋暮西歸途中書情

耿耿旅燈下愁多常少眠思鄉貴早發發在雞鳴前九月草木落平蕪連遠山秋陰和曙色萬木蒼蒼然去秋偶東遊今秋始西旋馬瘦衣裳破別家來二年憶歸復愁歸歸無一囊錢心雖非蘭膏安得不自然

秋懷

月出照北堂光華滿堦墀涼風從西至草木日夜衰桐柳減綠陰蕙蘭消碧滋感物私自念我心亦如之安得長少壯盛衰迫天時人生如石火爲樂長苦遲

別楊穎士盧克柔殷堯藩

倦鳥暮歸林浮雲晴歸山獨有行路子悠悠不知還人
生苦營營終日群動閒所務雖不同同歸於不閒扁舟
來楚鄉疋馬往秦關離憂繞心曲宛轉如循環且持一
杯酒聊以開愁顏

題贈定光上人

二十身出家四十心離塵得徑入大道乘此不退輪一
坐十五年林下秋復春春花與秋氣不感無情人我來
如有悟潛以心照身誤落聞見中憂喜傷形神安得遺
耳目冥然反天真

白集 卷九
祇役駱口驛喜蕭侍御書至兼觀新詩吟諷通

宵因寄八韻

時爲盪屋尉

日暮心無憀

連條切

吏役正營營忽驚芳信至復與新詩

并是時天無雲山館有月明月下讀數遍風前吟一聲
一吟三四歎聲盡有餘清雅哉君子文詠性不詠情使
我靈府中鄙恡不得生始知聽韶濩可使心和平

酬李少府曹長官舍見贈

低腰復斂手心體不遑安一落風塵下始知爲吏難公
事與日長宦情隨歲闌惆悵青袍袖芸香無半殘賴有
李夫子此懷聊自寬兩心如止水彼此無波瀾往往簿

書暇相勸強爲歡白馬晚蹋雪綠觴春煖寒戀月夜同
宿愛山晴可看野性自相近不是爲同官

留別

秋涼卷朝簾春煖撤夜衾雖是無情物欲別尚沉吟况
與有情別別隨情淺深二年歡笑意一旦東西心獨留
誠可念同行力不任前事詎能料後期諒難尋唯有潺
湲淚不惜共沾衿

曉別

曉鼓聲已半離筵坐難久請君斷腸歌送我和淚酒月
落欲明前馬嘶初別後浩浩聞塵中何由見回首

北園

北園東風起雜花次第開心知須臾落一日三四來花
下豈無酒欲酌復遲迴所思眇千里誰勸我一杯

惜栢李花

花細而繁色艷而黯亦花中之
有思者速衰易落故惜之耳

樹小花鮮妍香繁條軟弱高低二三尺重疊千萬萼朝
艷靄霏霏夕凋紛漠漠辭枝朱粉細覆地紅綃薄由來
好顏色常苦易銷鑠不見莨

魯曾堂切

蕩花狂風吹不落

照鏡

皎皎青銅鏡班班白絲鬢豈復更藏年實年君不信

新秋

西風飄一葉庭前颯已涼風池明月水衰蓮白露房其
奈江南夜絲絲自此長

夜雨

早蛩啼復歇殘燈滅又明隔牕知夜雨芭蕉先有聲

秋江送客

秋鴻次第過衰猿朝夕聞是日孤舟客此地亦離群濛
濛潤衣雨漠漠冒帆雲不醉潯陽酒煙波愁殺人

感遊寄遠

寄通州嚴侍御果州崔員外
豐州李舍人鳳州李郎中

昨日聞甲死今朝聞乙死知識三分中二分化為鬼逝
者不復見悲哉長已矣存者今如何去我皆萬里平生

知心者屈指能有幾通果豐鳳州眇然四君子相思俱
老大浮世如流水應歎舊交遊凋零日如此何當一杯
酒開眼笑相視

秋月

夜初色蒼然夜深光浩然稍轉西廊下漸滿南牕前況
是綠蕪地復茲清露天落葉聲策策驚鳥影翩翩棲禽
尚不穩愁人安可眠

白氏長慶集卷第十

唐太子少傅刑部尚書致仕贈尚書右僕射太原

白居易樂天著

明後學松江馬元調異甫校

感傷二

古調詩五言
凡七十八首

朱陳村

徐州古豐縣有村曰朱陳去縣百餘里桑麻青氛氲機
梭聲札札牛驢走紆紆女汲澗中水男採山上薪縣遠
官事少山深人俗淳有財不行商有丁不入軍家家守
村業頭白不出門生爲陳村民死爲陳村塵田中老與

幼相見何欣欣一村唯兩姓世世爲婚姻

其村唯朱陳二姓而已

親疎居有族少長游有羣黃雞與白酒歡會不隔旬生
者不遠別嫁娶先近鄰死者不遠葬墳墓多遶村旣安
生與死不苦形與神所以多壽考往往見玄孫我生禮
義鄉少小孤且貧徒學辨是非祇自取辛勤世法貴名
教士人重冠婚以此自桎梏信爲大謬人十歲解讀書
十五能屬文二十舉秀才三十爲諫臣下有妻子累上
有君親恩承家與事國望此不肖身憶昨旅游初迄今
十五春孤舟三適楚羸馬四經秦晝行有饑色夜寢無
安寃東西不暫住來往若浮雲離亂失故鄉骨肉多散

分江南與江北各有平生親平生終日別近者隔年聞
朝憂臥至暮夕哭坐達晨悲苦燒心曲愁霜侵髻根一
生苦如此長羨陳村民

讀鄧魴詩

塵架多文集偶取一卷披未及看姓名疑是陶潛詩看
名知是君惻惻令我悲詩人多蹇厄近日誠有之京兆
杜子美猶得一拾遺襄陽孟浩然亦聞髻成絲嗟君兩
不如三十在布衣擢第祿不及新婚妻未歸少年無疾
患湫^{苦盍切}死於路岐天不與爵壽唯與好文詞此理勿
復道巧曆不能推

寄元九

晨雞纔發聲夕雀俄斂翼晝夜往復來疾如出入息非
徒改年貌漸覺無心力自念因念君俱爲老所逼君年
雖校少顙頰謫南國三年不放歸炎瘴消顏色山無殺
草霜水有含沙蜮健否遠不知書多隔年得願君少愁
苦我亦加食食各保金石軀以慰長相憶

秋夕

葉聲落如雨月色白似霜夜深方獨臥誰爲拂塵牀

夜雨

我有所念人隔在遠遠鄉我有所感事結在深深腸鄉

遠去不得無日不瞻望腸深解不得無夕不思量況此
殘燈夜獨宿在空堂秋天殊未曉風雨正蒼蒼不學頭
陀法前心安可忘

秋霽

金木不相待炎涼雨中變林晴有殘蟬巢冷無留燕沉
吟卷長簾愴惻收團扇向夕稍無泥閒步青苔院月出
砧砧動家家擣秋練獨對多病妻不能理針線冬衣殊
未製夏服行將綻何以迎早秋一盃聊自勸

歎老三首

晨興照青鏡形影兩寂寞少年辭我去白髮隨梳落萬

化成於漸漸衰看不覺但恐鏡中顏今朝老於昨人年
少滿百不得長歡樂誰謂天地心千齡與龜鶴吾聞善
醫者今古稱扁鵲萬病皆可治唯無治老藥

我有一握髮梳理何稠直管似玄雲光今如素絲色匣
中有舊鏡欲照先歎息自從頭白來不欲明磨拭鵝頭
與鶴頸至老常如墨獨有人髣髯不得終身黑

前年種桃核今歲成花樹去歲新嬰兒今年已學步但
驚物長成不覺身衰暮去矣欲何如少年留不住因書
今日意徧寄諸親故壯歲不歡娛長年當悔悟

送兄弟回雪夜

日晦雲氣黃東北風切切時從村南還新與兄弟別離
襟淚猶溼迴馬嘶未歇欲歸一室坐天陰多無月夜長
火消盡歲暮雨凝結寂寞滿爐灰飄零上堦雪對雪畫
寒灰殘燈明復滅灰死如我心雪白如我髮所遇皆如
此頃刻堪愁絕迴念入坐忘轉憂作禪悅平生洗心法
正爲今宵設

溪中早春

南山雪未盡陰嶺留殘白西澗水已消春溜含新碧東
風來幾日蟄動萌艸拆潛知陽和功一日不虛擲愛此
天氣煖來拂溪邊石一坐欲忘歸暮禽聲嘖嘖蓬蒿隔

桑棗隱映煙火夕歸來問夜食家人烹薺麥

同友人尋澗花

聞有澗底花貰得村中酒與君來校遲已逢搖落後臨觴有遺恨悵望空溪口記取花發時期君重携手我生日日老春色年年有且作來歲期未知身健否

登村東古塚

高低古時塚上有牛羊道獨立最高頭悠哉此懷抱回頭向村望但見荒田草村人不愛花多種粟與棗自來此村住不覺風光好花少鶯亦稀年年春闇老

夢裴相公

五年生死隔一夕
寃夢通夢中如往日同直金鑾宮
髯金紫色分明水玉容
勤勤相眷意亦與平生同
既寤知是夢
憫然情未終
追想當時事何殊
昨夜中自我學
心法萬緣成一空
今朝爲君子流淚一沾胸

晝寢

坐整白單衣
起穿黃艸屨
朝食盥漱畢
徐下堦前步
暑風微變候
晝刻漸加數
院靜地陰陰
鳥鳴新葉樹
獨行還獨卧
夏景殊未暮
不作午時眠
日長安可度

別行簡

時行簡辟廬坦
劔南東川府

漠漠病眼花
星星愁髩雪
筋骸已衰憊
形影仍分訣
梓

州二千里劍門五六月豈是遠行時火雲燒棧熱何言
巾上淚乃是腸中血念此早歸來莫作經年別

觀兒戲

韶

田聊切

齒

初謹切

七八歲綺紈三四兒弄塵復鬪草盡日

樂嬉嬉堂上長年客髻間新有絲一看竹馬戲每憶童
騃時童騃饒戲樂老大多憂悲靜念彼與此不知誰是
癡

嘆常生

西村常氏子臥疾不須臾前旬猶訪我今日忽云徂時
我病多暇與之同野居園林青藹藹相去數里餘村鄰

無好客所遇唯農夫之子如何者往還猶勝無子今亦
已矣可爲一長吁

寄元九

一病經四年親朋書信斷窮通各易交自笑知何晚元
君在荆楚去日唯云遠彼獨侶何人心如石不轉憂我
貧病身書來唯勸勉上言少愁苦下道加食飯憐君爲
謫吏窮薄家貧福三寄衣食資數盈二十萬豈是貪衣
食感君心繼繼念我口中食分君身上暖不因身病久
不因命多蹇平生親友心豈得知深淺

以鏡贈別

人言似明月我道勝明月明月非不明一年十二缺豈
如玉匣裏如水常清徹月破天閨時圓明獨不歇我慙
貌醜老繞鬢班班雪不如贈少年迴照青絲髮因君千
里去持此將爲別

城上對月期友人不至

古人惜晝短勸令秉燭遊況此迢迢夜明月滿西樓復
有樽中酒置在城上頭期君君不至八月兩悠悠照水
煙波白照人肌髮秋清光正如此不醉即須愁

念金鑾子二首

衰病四十身嬌癡三歲女非男猶勝無慰情時一撫一

朝捨我去覓影無處所況念夭札時嘔啞初學語始知
骨肉愛乃是憂悲聚唯思未有前以理遣傷苦忘懷日
已久三度移寒暑今日一傷心因逢舊乳母

與爾爲父子八十有六旬忽然又不見邇來三四春形
質本非實氣聚偶成身恩愛元是妄緣合暫爲親念茲
度有悟聊用遣悲辛暫將理自奪不是忘情人

對酒

人生一百歲通計三萬日何況百歲人人閒百無一賢
愚共零落貴賤同埋沒東岱前後覓北邙新舊骨復聞
藥誤者爲愛長生術又有憂死者爲貪政事筆藥誤不

得老憂死非因疾誰言人最靈知得不知失何如會親
友飲此杯中物能沃煩慮消能陶真性出所以劉阮輩
終年醉兀兀

渭村雨歸

渭水寒漸落離離蒲稗

薄賣切

苗閒傍沙邊立看人刈葦

茗近水風景冷晴明猶寂寥復茲夕陰起野思重蕭條
蕭條獨歸路暮雨濕村橋

諭懷

黑頭日已白白面日已黑人生未死閒變化何終極常
言在已者莫若形與色一朝改變來止遏不能得況彼

身外事悠悠通與塞

喜友至留宿

村中少賓客柴門多不開忽聞車馬至云是故人來况
值風雨夕愁心正悠哉願君且同宿盡此手中杯人生
開口笑百年都幾回

西原晚望

花菊引閒步行上西原路原上晚無人因高聊四顧南
陌有煙火北陌連墟墓村鄰何蕭條近者無百步吾廬
在其下寂寞風日暮門外轉枯蓬籬根伏寒兔故園汴
水上離亂不堪去近歲始移家飄然此村住新屋五六

閒古槐八九樹便是衰病身此身終老處

感鏡

美人與我別留鏡在匣中自從花顏去秋水無芙蓉經
年不開匣紅塵覆青銅今朝一拂拭自顧顛顚容照罷
重惆悵背後雙盤龍

村居臥病二首

戚戚抱羸病悠悠度朝暮夏木纔結陰秋蘭已含露前

日巢中卵化爲雛飛去昨日穴中蟲蛻

輸芮切

爲蟬上樹

四時未嘗歇一物不暫住唯有病客心沉然獨如故

新秋久病客起步村南道盡日不逢人蟲聲徧荒艸西

風吹白露野綠秋仍早艸木猶未傷先傷我懷抱朱顏
與玄鬢強健幾時好況爲憂病侵不得依年老

種黍三十畝雨來苗漸大種薤二十畦秋來欲堪刈望
黍作冬酒留薤爲春菜荒村百物無待此養衰瘵葺廬
備陰雨補褐防寒歲病身知幾時且作明年計

沐浴

經年不沐浴塵垢滿肌膚今朝一澡濯衰瘦頗有餘老
色頭鬢白病形肢體虛衣寬有賸帶髮少不勝梳自問
今年幾春秋四十初四十已如此七十復何如

栽松二首

小松未盈尺心愛手自移蒼然澗底色雲濕煙霏霏栽
植我年晚長成君性遲如何過四十種此數寸株得見
成陰否人生七十稀

愛君抱晚節憐君含直文欲得朝朝見壻前故種君知
君死則已不死會凌雲

病中友人相訪

臥久不記日南窓昏復昏蕭條艸簷下寒雀朝夕聞強
扶床前杖起向庭中行偶逢故人至便當一逢迎移榻
就斜日披裘倚前楹閒談勝服藥稍覺有心情

自覺二首

四十未爲老憂傷早衰惡前歲二毛生今年一齒落形骸日損耗心事同蕭索夜寢與朝食其閒味亦薄同歲崔舍人容光方灼灼始知年與貌衰盛隨憂樂畏老老轉逼憂病病彌縛不畏復不憂是除老病藥

朝哭心所愛暮哭心所親親愛零落盡安用身獨存幾許平生歡無限骨肉恩結爲腸閒痛聚作鼻頭辛悲來四肢緩泣盡雙眸昏所以年四十心如七十人我聞浮圖教中有解脫門置心爲止水視身如浮雲抖擻垢穢衣度脫生死輪胡爲戀此苦不去猶逡巡回念發弘願願此見在身但受過去報不結將來因誓以智慧水永

洗煩惱塵不將恩愛子更種悲憂根

夜雨有念

以道治心氣終歲得晏然何乃戚戚意忽來風雨天旣
非慕榮顯又不恤饑寒胡爲苦不樂抱膝殘燈前形影
闇相問心默對以言骨肉能幾人各在天一端吾兄寄
宿州吾弟客東川南北五千里吾身在中閒欲去病未
能欲住心不安有如波上舟此縛而彼牽自我向道來
于今六七年鍊成不二性消盡萬千緣唯有恩愛火往
往猶熬煎豈是藥無効病多難盡蠲

寄楊六

楊攝萬年縣尉
予爲贊善大夫

青宮官冷靜赤縣有繁劇一閒復一忙動作經時隔清
觴久未酌白日頓虛擲念此忽踟躕悄然心不適豈無
舊交結久別或遷易亦有新往還相見多形迹唯君於
我分堅久如金石何況老大來人情重婚戚會稀歲月
急此事真可惜幾回開口笑便到髭鬚白公門苦鞅掌
盡日無閒隙猶冀乘暝來靜言同一夕

送春

三月三十日春歸日復暮惆悵問春風明朝應不住送
春曲江上眷眷東西顧但見撲水花紛紛不知數人生
似行客兩足無停步日日進前程前程幾多路兵刀與

水火盡可違之去唯有老到來人間無避處感時良爲
已獨倚池南樹今日送春心心如別親故

哭李三

去年渭水曲秋時訪我來今年常樂里春日哭君回哭
君仰問天天意安在哉若必奪其壽何如不與才落然
身後事妻病女瓔孩

別李十一後重寄

自此後詩在
江州路上作

秋日正蕭條驅車出蓬華回望青門道目極心鬱鬱豈
獨戀鄉土非關慕簪紱所愴別李君平生同道術俱承
金馬詔聯秉諫臣筆共上青雲梯中途一相失江湖我

方往朝廷君不出蕙帶與華簪相逢是何日

初出藍田路作

停驂問前路路在秋雲裏蒼蒼縣南道去途從此始絕
頂忽盤上衆山皆下視下視千萬峰峰頭如浪起朝經
韓公坂夕次藍橋水潯陽僅四千始行七十里人煩馬
蹄踰勞苦已如此

仙娥峰下作

我爲東南行始登商山道商山無數峰最愛仙娥好差
叅樹若插_{通合切}匣_匣雲如抱渴望寒玉泉香聞紫芝艸
青崖屏削碧白石床鋪縞向無如此物安足留四皓感

白集 卷十
彼私自問歸山何不早可能塵土中還隨衆人老

微雨夜行

漠漠秋雲起悄悄夜寒生但覺衣裳濕無點亦無聲

再到襄陽訪問舊居

管到襄陽日髯髯初有髭今過襄陽日髭鬚半成絲舊
遊都是夢乍到忽如歸東郭蓬蒿宅荒涼今屬誰故知
多零落間井亦遷移獨有秋江水煙波似舊時

寄微之三首

江州望通州天涯與地末有山萬丈高有江千里濶閒
之以雲霧飛鳥不可越誰知千古險爲我二人設通州

君初到鬱鬱愁如結江州我方去迢迢行未歇道路日乖隔音信日斷絕因風欲寄語地遠聲不徹生當復相逢死當從此別

君遊襄陽日我在長安住君今在通州我過襄陽去襄陽九里郭樓雉連雲樹顧此稍依依是君舊遊處蒼茫蒹葭水中有潯陽路此去更相思江西少親故

去國日已遠喜逢物似人如何舍此意江上坐思君有如河嶽氣相合方氛氲狂風吹中絕兩處成孤雲風迴終有時雲合豈無因努力各自愛窮通我爾身

喜逢一作稀逢

舟中雨夜

江雲闇悠悠江風冷修修夜雨滴船背風浪打船頭船
中有病客左降向江州

夜聞歌者

宿鄂州

夜泊鸚鵡洲秋江月澄徹鄰船有歌者發調堪愁絕歌
罷繼以泣泣聲通復咽尋聲見其人有婦顏如雪獨倚
帆檣立娉婷十七八夜淚如真珠雙雙墮明月借問誰
家婦歌泣何淒切一問一沾襟低眉終不說

江樓聞砧

江州作

江人授衣晚十月始聞砧一夕高樓月萬里故園心

宿東林寺

經窓燈焰短僧爐火氣深
索落廬山夜風雪宿東林

憶洛下故園

時淮汝寇
戎未滅

潯陽遷謫地洛陽離亂年
煙塵三川上炎瘴九江邊
鄉心坐如此秋風仍颯然

贈別崔五

朝送南去客暮迎北來賓
孰云當大路少遇心所親
勞者念息肩熱者思濯身
何如獨愁日忽見平生人
平生已不淺是日重殷勤
問從何處來及此江亭春
江天春多雲夜月隔重陰
移樽樹間飲燈照花紛紛
一會不易得餘事何足云
明旦又分手今夕且歡忻

春晚寄微之

三月江水闊悠悠桃花波年芳與心事此地兩蹉跎南
國方譴謫中原正兵戈眼前故人少頭上白髮多通州
更迢邐春盡復如何

漸老

今朝復明日不覺年齒暮白髮逐梳落朱顏辭鏡去當
春頗愁寂對酒寡歡趣遇境多愴辛逢人益敦故形質
屬天地推遷從不住所怪少年心銷磨落何處

送幼史

淮右寇未散江西歲再徂故里干戈地行人風雪途此

時與爾別江畔立踟躕

夜雪

已訝衾枕冷復見牕戶明
夜深知雪重時聞折竹聲

寄行簡

鬱鬱眉多斂默默口寡言
豈是願如此舉目誰與歡去

春爾西征從事巴蜀間
今春我南謫抱疾江海壖

而緣切

相去六千里地絕天邈然
十書九不達何以開憂顏
渴人多夢飲飢人多夢食
春來夢何處合眼到東川

首夏

孟夏百物滋動植一時好
麋鹿樂深林蟲蛇喜豐草
翔

禽愛密葉游鱗悅新藻天和遺漏處而我獨枯槁一身
在天末骨肉皆遠道舊國無來人寇戎塵浩浩憂沉竟
何益祇自勞懷抱不如放身心冥然任天造潯陽多美
酒可使杯不燥湔魚賤如泥烹炙無昏早朝飯山下寺
暮醉湖中島何必歸故鄉茲焉可終老

孟夏思渭村舊居寄舍弟

嘖嘖雀引雛稍稍筍成竹時物感人情思我故鄉曲故
園渭水上十載事樵牧手種榆柳成陰陰覆墻屋免隱
豆苗肥鳥鳴桑椹熟前年當此時與爾同遊矚詩書課
弟姪農圃資童僕日暮麥登場天晴蠶拆簇弄泉南澗

坐待月東亭宿興發飲數杯悶來夢一局一朝忽分散
萬里仍羈束并鮒思反泉籠鶯悔出谷九江地卑濕四
月天炎燠苦雨初入梅瘴雲稍含毒泥秧水畦稻灰種
畬田粟已訝殊歲時仍嗟異風俗閒登郡樓望日落江
山綠歸雁拂鄉心平湖斷人目如我方漂泊舊里君幽
獨何時同一瓢飲水心亦足

早蟬

六月初七日江頭蟬始鳴石楠深葉裡薄暮兩三聲一
催衰鬢色再改故園情西風殊未起秋思先秋生憶昔
在東掖宮槐花下聽今朝無限思雲樹遶湓城

感情

中庭曬服翫忽見故鄉履昔贈我者誰東隣嬋娟子因
思贈時語特用結終始永願如履綦雙行復雙止自吾
謫江郡漂蕩三千里爲感長情人提攜同到此今朝一
惆悵反覆看未已人隻履猶雙何曾得相侶可嗟復可
惜錦表繡爲裏況經梅雨來色黯花艸死

南湖晚秋

八月白露降湖中水方老旦夕秋風多衰荷半傾倒手
攀青楓樹足蹋黃蘆艸慘淡老容顏零落秋懷抱有兄
在淮楚有弟在蜀道萬里何時來更波白浩浩

郡廳有樹晚榮早凋人不識名因題其上

潯陽郡廳後有樹不知名秋先梧桐落春後桃李榮五
月始榮動八月已凋零左右皆松桂四時鬱青青豈量
雨露恩沾濡不均平榮枯各有分天地本無情而我亦
相類早衰向晚成形骸少多病三十不豐盈毛髻早改
變四十白髭生誰教兩蕭索相對此江城

感秋懷微之

葉下湖有波秋風此時至誰知獲落心先納蕭條氣推
移感時歲漂泊思同志昔爲煙霞侶今作泥塗吏白鷗
毛羽弱青鳳文章異各閉一籠中歲晚同顛顛

自集 卷十 十七
因沐感髮寄朗上人二首

年長身轉慵百事無所欲乃至頭上髮經年方一沐沐
稀髮苦落一沐仍半禿短鬢經霜蓬老面辭春木強年
過猶近衰相來何速應是煩惱多心焦血不足

漸少不滿把漸短不盈尺况茲短少中日夜落復白既
無神仙術何除老死籍祇有解脫門能度衰苦厄掩鏡
望東寺降心謝禪客衰白何足言剃落猶不惜

早蟬

月出先照山風生先動水亦如早蟬聲先入閒人耳一

聞意結再聽鄉心起渭上新單老元聽渾相似衡門

有誰聽日暮槐花裏

苦熱喜涼

經時苦炎熱心體但煩倦白日一何長清秋不可見歲
功成者去天數極則變潛知寒燠間遷次如乘傳火雲
忽朝斂金風俄夕扇簟枕遂清涼筋骸稍康健因思望
月侶好卜迎秋宴竟夜無客來引杯還自勸

早秋晚望兼呈韋侍郎

九派繞孤城城高生遠思人煙半在船野水多於地穿
霞日脚直驅雁風頭利去國來幾時江上秋三至夫君
亦淪落此地同漂寄憫然向隅心摧頽觸籠翅且謀眼

前計莫問曾中事潯陽酒甚濃相勸時時醉

司馬宅

雨徑綠蕪合霜園紅葉多蕭條司馬宅門巷無人過唯
對大江水秋風朝夕波

司馬廳獨宿

荒涼滿庭艸偃亞侵簷竹府吏下廳簾家僮開被幙數
聲城上漏一點窓前燭官曹冷侶冰誰肯來同宿

夢與李七庾三十三同訪元九

夜夢歸長安見我故親友損之在我左順之在我右云
是二月天春風出携手同過清夜司馬尋元九元九

正獨坐見我笑開口還指西院花
仍開北亭酒如言各有故侶惜歡
難久袖合俄傾閒神離欠伸後覺
來疑在側求索無所有殘燈影閃
牆斜月光穿牖天明西北望萬里
君知否老去無見期踟躕搔白首

秋瑾

風露颯已冷天色亦黃昏中庭有
槿花榮落同一晨秋開已寂寞夕
殞何紛紛正憐少顏色復嘆不逡
巡感此因念彼懷哉聊一陳男兒
老富貴女子晚婚姻頭白始得志
色衰方事人後時不獲已安得如
青春

荅元郎中楊員外喜烏見寄

四十四
字成

南宮鴛鴦地何忽鳥來止故人錦帳郎聞鳥笑相視疑
鳥報消息望我歸鄉里我歸應待鳥頭白慙愧元郎誤
歡喜







